

# Penyebaran ilmu isu kekeluargaan



TIMBALAN Menteri Hal Ehwal Ugama, Yang Mulia Dato Paduka Awang Haji Abdul Mokti bin Haji Mohd. Daud (dua, kiri) semasa hadir selaku tetamu kehormat pada Majlis Penutup Seminar Antarabangsa Fiqh Al-Ussrah 2017 anjuran Pusat Kajian Fiqh al-Ussrah, KUPU SB.

**BANDAR SERI BEGAWAN,** Khamis, 30 Mac. - Seminar Antarabangsa Fiqh Al-Ussrah 2017 anjuran Pusat Kajian Fiqh al-Ussrah, Kolej Universiti Perguruan Ugama Seri Begawan (KUPU SB) menjadi platform untuk penyebaran ilmu dan perkongsian maklumat serta pengalaman berkaitan dengan isu-isu kekeluargaan di Negara Brunei Darussalam.

Seminar dua hari itu sekali gus menjadi wadah dalam menanai objektif Pusat Kajian Fiqh al-Ussrah

untuk menjadi pusat kajian dan penyelidikan ilmiah berhubung dengan Fiqh al-Ussrah pada peringkat kebangsaan dan antarabangsa bagi keperluan agama, masyarakat dan negara.

Sehubungan itu, majlis penutupan seminar tersebut berlangsung di Dewan Tarbiyah, KUPU SB yang dihadiri oleh Timbalan Menteri Hal Ehwal Ugama, Yang Mulia Dato Paduka Awang Haji Abdul Mokti bin Haji Mohd. Daud selaku tetamu kehormat.

Seminar itu diharap dapat memberikan penjelasan kepada masyarakat mengenai pendidikan kekeluargaan termasuk cabaran-cabaran dalam menjalani hidup berkeluarga.

Sementara itu, Profesor Madya Dr. Sharifah Hayaati Syed Ismail dari Jabatan Siasah Syar'iyah Akademi Pengajian Islam Universiti Malaya, Malaysia semasa membentangkan kertas utamanya antara lain menyentuh tiga pendekatan, iaitu al-Tadayyun, al-Maqasidi dan al-Wasatiyyah

Oleh : Mahirah Haji Mohd. Raduan  
Foto : Mohd. Sahrizal Haji Said

sebagai asas penyelesaian Pengurusan Keluarga dan Kerjaya Secara Islam (PKKI).

Rumusan kertas utamanya bertajuk 'Mengurus Keluarga dan Kerjaya dalam Organisasi : Analisis Menerusi Pendekatan al-Tadayyun, al-Maqasidi dan al-Wasatiyyah' itu juga menerangkan cabaran menguruskan keluarga dan kerjaya dalam alaf baharu memerlukan pada strategi atau pendekatan bersepadu di antara kaedah moden juga agama.

Ketiga-tiga pendekatan itu tambahnya, menjurus pada usaha memperkukuhkan penghayatan beragama (al-Tadayyun) melalui 10 kaedah, kejelasan arah tuju atau matlamat (al-Maqasidi) serta penerapan nilai akhlak (al-Wasatiyyah) dalam memandu individu sama ada lelaki mahupun perempuan ke arah kejayaan dalam mengurus keluarga dan kerjaya.

Resolusi seminar disampaikan oleh Ketua Bahagian Kertas Kerja, Perumus dan Pelapor, Dr. Awang Zulkifli bin Haji Zakaria.



PROFESOR Madya Dr. Sharifah Hayaati Syed Ismail semasa membentangkan kertas utama pada seminar tersebut.

## Memperkaya strategi ke arah keseimbangan keluarga dan kerjaya



ANTARA jemputan yang hadir semasa Majlis Penutup Seminar Antarabangsa Fiqh Al-Ussrah 2017.

Oleh : Saerah Haji Abdul Ghani  
Foto : Mohd. Sahrizal Haji Said

**BANDAR SERI BEGAWAN,** Khamis, 30 Mac. - Gabungan pendekatan yang bersifat spiritual, nilai dan sistem Islam yang dinamakan pendekatan al-Tadayyun, al-Maqasidi dan al-Wasatiyyah dijadikan asas pendekatan dalam memperkaya strategi serta panduan ke arah usaha keseimbangan keluarga juga kerjaya.

Perkara demikian merupakan salah satu perkara yang terkandung dalam resolusi Seminar Antarabangsa Fiqh Al-Ussrah yang disampaikan oleh Ketua Bahagian Kertas Kerja, Perumus dan Pelapor, Dr. Awang Zulkifli bin Haji Zakaria pada Majlis Penutupan Rasmi Seminar berkenaan berlangsung di Dewan Tarbiyah, Kolej Universiti

Perguruan Ugama Seri Begawan, di sini.

Semasa menyampaikan resolusi, Dr. Awang Zulkifli menyatakan, *bi'ah* atau persekitaran yang bersesuaian ciri-ciri keislaman akan dapat melahirkan individu Muslim yang sempurna akal, rohani dan jasmani.

Beliau menambah, badan-badan sosial dan sukarelawan yang berilmu serta berkemahiran hendaklah diperluaskan keterlibatan mereka dalam membantu penyelesaian isu-isu kekeluargaan juga mengatasi masalah sosial.

Katanya, masalah perceraian dan kes anak tidak sah taraf juga adalah amat membimbangkan serta perlu ditangani

dengan segera secara kolektif melalui pendidikan agama yang mantap dan kesedaran masyarakat.

"Pembentukan generasi berwawasan, memerlukan ibu bapa memahami konsep psikologi Islam dalam pendidikan anak-anak semasa kecil hingga dewasa," ujarnya.

Beliau seterusnya menyentuh perkara yang terkandung dalam resolusi mengenai isu keganasan dan masalah rumah tangga hendaklah diatasi melalui penguatkuasaan peraturan juga undang-undang syariah yang telah ditetapkan, di samping peranan ibu bapa adalah penting dalam membentuk sahsiah anak-anak yang bertakwa bersumberkan Al-Quran dan Al-Hadis.

Menyentuh perkara terakhir yang terkandung dalam resolusi, perlu adanya kerjasama yang mantap di antara sekolah dengan ibu bapa dan masyarakat agar dapat melahirkan sekolah berkesan.

Dalam pada itu, seminar mencadangkan Fiqh al-Ussrah perlu dimasukkan dalam kurikulum pendidikan Islam sebagai kursus teras dan wajib pada peringkat Institusi Pengajian Tinggi (IPT) serta Pusat Kajian Fiqh al-Ussrah perlu menerbitkan buku-buku bersiri mengenai pendidikan kekeluargaan Islam, di samping Kursus Maqasid al-Syariah perlu ditawarkan sebagai kursus teras di IPT.

Selain itu, seminar juga mencadangkan masjid dan media perlu berperanan dalam menyelesaikan isu-isu kekeluargaan melalui program-program berterusan yang mendedahkan panduan hidup berkeluarga secara Islami serta pengendali kursus-kursus keibubapaan dan bengkel menghalusi Fiqh al-Ussrah dalam meningkatkan pengetahuan serta kefahaman keluarga juga masyarakat.

## UNISSA sertu bangunan surau tambahan



REKTOR UNISSA, Dr. Awang Haji Norarfan bin Haji Zainal (dua, kiri) bersama kakitangan UNISSA bergotong-royong menyertu bangunan tambahan surau UNISSA.

Siaran Akhbar dan Foto :  
Universiti Islam Sultan Sharif Ali

**BANDAR SERI BEGAWAN,** Khamis, 30 Mac. - Universiti Islam Sultan Sharif Ali (UNISSA) telah mengadakan acara menyertu bagi bangunan tambahan surau universiti berkenaan.

Kerja bergotong-royong itu dihadiri oleh Rektor UNISSA, Dr. Awang Haji Norarfan bin Haji Zainal yang turut sama menyumbangkan tenaga dalam melaksanakan majlis tersebut bersama dengan pegawai-pegawai utama, pegawai-pegawai dan kakitangan UNISSA.

Acara itu juga turut dibantu oleh pihak Jabatan Bomba dan Penyelamat dan Jabatan Perkhidmatan Air, Jabatan Kerja Raya.

Amalan tersebut bertujuan bagi

membersihkan najis agar sidang jemaah tidak berasa was-was semasa mengerjakan ibadah di dalam surau berkenaan.

Penyertuan bangunan surau itu dilakukan dengan cara mencuci menggunakan tujuh kali dengan air yang bersih dan satu daripadanya menggunakan tanah.

Surau yang terletak berdekatan dengan Kolej Kediaman (Asrama) Universiti, asalnya adalah di atas tapak surau lama, yang mana hanya dapat menampung seramai 200 jemaah.

Apabila terlaksananya projek menaik taraf bangunan selesai sepenuhnya, surau berkenaan dijangka akan dapat menampung seramai 400 jemaah.